

Philippine Biblical Worldview Institute

Certificate in Biblical Studies

CBS700 The Life of Jesus

Conrad Jun Tolosa

CBS704 *Death, Resurrection and Ascension of Jesus*

Required Reading

Si Judas Iscariot, ang isa sa labindalawang disipulo, ay pumunta sa chief priest at nagtanong kung ano ang kanilang ibibigay sa kanya kung ibibigay niya si Jesus sa kanila. Binigyan nila si Judas ng 30 pirasong silver at mula noon ay naghanap siya ng pagkakataon upang maipagkanulo niya si Jesus.

Ang Banal na Hapunan (30AD). Sa unang araw ng Unleavened Bread, ang mga disipulo ay nagtanong kay Jesus kung saan Niya nais na ganapin nila ang Passover. Binigyan sila ng instruction ni Jesus. Nang gabing iyon, habang sila ay kumakain, sinabi ni Jesus na ang isa sa kanila ay magtataksil sa Kanya. Sila ay nalungkot at nagtanong kay Jesus kung sila ba ang Kanyang tinutukoy. Tinanong din ni Judas kung siya ba ang Kanyang tinutukoy. Sinagot siya ni Jesus ng, *Sinabi mo na.*

Ngayon, habang sila ay kumakain, dumampot si Jesus ng tinapay at matapos magpasalamat sa Diyos ay pinaghati-hati Niya iyon, ibinigay sa mga alagad at sinabing, *Kumuha kayo at kumain, ito ang Aking katawan.* Pagkatapos, dinampot Niya ang kopa, nagpasalamat at ibinigay iyon sa kanila at sinabing, *Uminon kayong lahat mula rito, sapagkat ito ang Aking dugo na katibayan ng tipang mabubuhos para sa kapatawaran ng kasalanan ng marami.*

Hinugasan ni Jesus ang mga Paa ng mga Alagad. Bisperas na noon ng Paskwa. Alam ni Jesus na dumating na ang takdang oras ng kanyang pag-alis sa daigdig upang bumalik sa Ama. Pagsapit ng hapunan, inilagay na ng diyablo sa isip ni Judas na ipagkanulo si Jesus. Si Jesus ay naglagay ng tubig sa isang palanggana at sinimulang hugasan ang mga paa ng mga alagad at pinunasan ng tuwalyang nakabigkis sa kanyang baywang.

Ginawa iyon ni Jesus upang maging halimbawa sa mga alagad at ito ay kanilang tularan. Dapat din nilang hugasan ang paa ng isa't isa. Sinabi sa kanila ni Jesus *na ang alipin ay hindi nakakahigit sa kanyang panginoon, ni ang sinugo kaysa sa nagsugo sa kanya. Ngayong alam na ninyo ito, pinagpala kayo kung ito'y gagawin ninyo.*

Ang Pangako tungkol sa Banal na Espiritu. Si Jesus ay nangako sa kanyang mga alagad na sila ay bibigyan niya ng isa pang Patnubay na magiging kasama nila magpakailanman. Iyon ay ang Espiritu ng katotohanan, na hindi matanggap ng sanlibutan. Ang Espiritu Santo na isusugo ng Ama sa pangalan ni Jesus, ang siyang magtuturo sa kanila ng lahat ng bagay at magpapaalala ng lahat ng sinabi ni Jesus sa kanila.

Idinalangin ni Jesus ang Kanyang mga Alagad: Pagkasabi ni Jesus ng mga iyon, tumingala Siya sa langit at Kanyang sinabi na natapos na Niya ang pinapagawa ng Kanyang Ama. Idinalangin ni Jesus ang lahat ng ibinigay sa Kanya ng Ama. Hiniling ni Jesus na pakaingatan sila at bigyan ng kagalakan habang nasa sanlibutan.

Ang Panalangin sa Gethsemane: Isinama ni Jesus ang kanyang mga alagad sa Bundok at Siya ay nanalangin sapagkat nagsimulang mabagabag at maghirap ang Kanyang kalooban. Nagbalik Siya at dinatnan Niyang natutulog ang tatlong alagad Niya. Sinabi Niya sa kanila na sila ay magbantay at manalangin upang huwag silang madaig ng tukso. Dalawang beses pang bumalik si Jesus sa bundok at nanalangin, dalawang beses din Niyang nadatnan ang kanyang mga alagad na natutulog. Kaya't sinabi niya sa kanila na “*dumating na ang oras na ang Anak ng Tao ay ipagkakanulo sa mga makasalanan.*”

Ang Pagdakip Kay Jesus (30AD). Nagsasalita pa lamang si Jesus, nang dumating si Judas kasama ang maraming tao na may dalang mga tabak at pamalo. Isinugo sila ng mga punong pari at mga pinuno ng bayan. Nilapitan ni Judas si Jesus at hinagkan sapagkat sinabi niya sa mga tao na kung sino ang kanyang hahagkan, iyon ang kanilang dadakpin.

Nangyari ang lahat ng iyon upang matupad ang sinulat ng mga propeta. Dinakip si Jesus at tumakas ang mga alagad.

Si Jesus sa Harap ng Kataas-taasang Kapulungan ng mga Judio: Si Jesus ay dinala sa bahay ni Caiafas, ang pinakapunong pari; doon nagtipon ang mga tagapagturo ng Kautusan at ang mga pinuno ng bayan. Samantala, ang buong kapulungan ay naghahanap ng maipaparatang laban kay Jesus ngunit wala silang nakita kahit na maraming humarap na sinungaling na saksi laban sa kanya. Biglang may dalawang saksi na humarap at nagsabing “*kaya ni Jesus gibain ang Templo ng Diyos at muli itong itatayo sa loob ng tatlong araw.*”

Hindi umiimik si Jesus at tinanong Siyang muli ng pinakapunong pari kung siya ba talaga ang Cristo, na Anak ng Diyos. At sumagot si Jesus na di magtatagal at makikita na nila ang Anak ng Tao na nakaupo sa kanan ng makapangyarihang Diyos at dumarating na nasa alapaap!

Pagkarinig nito, pinunit ng pinakapunong pari ang kanyang damit at sinabing nilapastangan ni Jesus ang Diyos. At nais nilang mamatay si Jesus. Dinuraan nila si Jesus sa mukha at pinagsusuntok. Pinagsasampal naman siya ng iba, at kinutya.

Ikinaila ni Peter si Jesus: Samantala, si Peter ay nakaupo noon sa patyo. Nilapitan siya ng isang babae at tinanong kung kasamahan rin siya ni Jesus na taga-Galilea. Ngunit nagkaila si Peter sa harap ng lahat. Tatlong beses ikinaila ni Peter si Jesus. At tumilaok ang manok. Biglang naalala ni Peter ang sinabi ni Jesus, “*na bago tumilaok ang manok, tatlong beses niyang ikakaila si Jesus.*” Lumabas si Peter at tumangis nang buong kapaitan.

Dinala si Jesus kay Pilato: Kinaumagahan, nagpulong ang mga punong pari at mga pinuno ng bayan kung paano nila maipapapatay si Jesus. Siya'y kanilang iginapos at dinala kay Pilato na gobernador.

Ang Pagkamatay ni Judas: Nang malaman ng taksil na si Judas na si Jesus ay nahatulan na mamatay, nagsisi siya at isinauli sa mga punong pari at mga pinuno ng bayan ang tatlumpung pirasong pilak. Inihagis ni Judas sa loob ng Templo ang mga pilak at pagkaalis doon, siya'y nagbigti.

Sa Harapan ni Herodes: Nang malaman ni Pilato na si Jesus ay sakop ni Haring Herodes, ipinadala nila si Jesus sa kanya. Tuwang-tuwa si Herodes nang makita si Jesus. Matagal na niyang ibig makita ito sapagkat

marami siyang nababalitaan tungkol dito. Umaasa si Herodes na gagawa si Jesus ng ilang himala, at nais niyang makita iyon. Marami siyang itinanong kay Jesus, ngunit hindi ito sumagot kahit minsan.

Si Jesus ay hinamak at tinuya ni Herodes at ng mga kawal nito. Siya ay dinamitan nila ng magarang damit, at ipinabalik kay Pilato. At nang araw ding iyon, naging magkaibigan sina Herodes at Pilato na dati'y magkagalit.

Hinatulang Mamatay si Jesus: Nakaugalian na ng gobernador na tuwing Paskwa ay magpalaya ng isang bilanggo na hinihiling ng taong-bayan. Noon ay may isang kilalang bilanggo na kilala sa kasamaan na ang pangalan ay *Barabbas*. Tinanong ni Pilato ang taong bayan kung sino ang nais nilang palayain. Si Barabbas ba o si Jesus na tinawag na Cristo. Ngunit mas pinili ng mga tao na palayain si Barabbas. At nais nila na si Cristo ay ipako sa Krus.

Walang nagawa si Pilato kaya't pinalaya nila si Barabbas at ipinahagupit si Jesus. Pagkatapos, ibinigay siya sa kanila upang ipako sa krus.

Hinamak ng mga Kawal si Jesus: Si Jesus ay dinala ng mga kawal ng gobernador sa palasyo nito, at nagkatipon ang buong batalyon sa paligid niya. Siya'y hinubaran nila at sinuotan ng isang balabal na matinkad na pula. Kumuha sila ng matitinik na baging at ginawa itong korona at ipinutong sa Kanya. Pagkatapos, pinahawak sa Kanyang kanang kamay ang isang tangkay ng tambo. Siya'y niluhud-luhuran nila at kinutya. Matapos kutyain, hinubad nila ang balabal at muling sinuotan ng sarili niyang damit. Pagkatapos, inilabas Siya upang ipako sa krus.

Crucifixion (30 AD)

Ipinako sa Krus si Jesus: Paglabas ng lungsod, nakita ng mga sundalo si Simon na taga-Cirene. Pilit nilang ipinapasan sa kanya ang krus ni Jesus. Binigyan nila si Jesus ng alak na hinaluan ng apdo, ngunit nang matikman Niya iyon ay hindi niya ininom.

Nang maipako na si Jesus sa krus, pinaghati-hatian ng mga kawal ang Kanyang mga damit, naupo sila at Siya'y binantayan. Inilagay nila sa Kanyang ulunan ang paratang laban sa Kanya na may nakasulat na ganito, "Ito'y si Jesus na Hari ng mga Judio." At may dalawang magnanakaw na ipinako rin sa krus na kasabay ni Jesus.

Ang Pagkamatay ni Jesus: Nang mag-aalas tres na ng hapon, sumigaw si Jesus at Kanyang sinabi sa Diyos Ama kung bakit Siya nito pinabayaan. At sa pangalawang pagkakataon, muling sumigaw si Jesus nang malakas at Siya'y nalagutan ng hininga.

Biglang nahati ang tabing ng Templo. Nayanig ang lupa at nabiyak ang mga bato. Nasindak ang opisyal at ang mga kawal nang maramdaman nila ang lindol at masaksihan ang lahat ng nangyari. Sabi nila "Tunay na siya'y Anak ng Diyos".

Ang Paglibing Kay Jesus: Pagsapit ng dilim, dumating si Joseph, isang mayamang taga-Arimathea na tagasunod din ni Jesus. Kinuha niya ang bangkay ni Jesus binalutan niya ito ng malinis na tela ng lino. Inilagay niya ito sa kanyang libingan. Naroon sina Mary Magdalene at ang isa pang Mary na nakaupo sa tapat ng libingan.

Ang mga Bantay sa Libingan: Kinabukasan, pagkatapos ng Araw ng Paghahanda, sama-samang nagpunta kay Pilato ang mga punong pari at ang mga Pariseo. Sinabi nila pabantayan ang libingan ni Jesus dahil baka sila'y dayain ng mga alagad ni Jesus sapagkat naalala nila ang sinabi ni Jesus na Siya ay mabubuhay sa ikatlong araw.

The Resurrection (30AD)

Muling Nabuhay si Jesus: Makaraan ang Araw ng Pamamahinga, sa pagbubukang liwayway nang unang araw ng linggo, pumunta si Mary Magdalene at ang isa pang Mary sa libingan ni Jesus upang tingnan ito. Biglang lumindol nang malakas sapagkat bumabâ mula sa langit ang isang anghel ng Panginoon. Iginulong nito ang batong nakatakip sa libingan at umupo sa ibabaw niyon.

Sinabi sa kanila ng anghel na si Jesus ay wala na sa libingan sapagkat ito ay muling nabuhay. Ipinakita ng anghel ang himlayan ni Jesus. At sinabing magmadali sila at ibalita sa Kanyang mga alagad na Siya'y muling nabuhay!

Ngunit sinalubong sila ni Jesus at binati. Lumapit sila sa Kanya, hinawakan ang Kanyang mga paa at sinamba Siya. Sinabi sa kanila ni Jesus, *"Huwag kayong matakot. Humayo kayo't sabihin sa mga kapatid Ko na pumunta sila sa Galilea, at makikita nila Ako roon."*

Ang Ulat ng mga Bantay: Nalaman ng punong pari ang nangyari. Sinuhulan nila ang mga bantay na ipamalita na ninakaw ng mga alagad ang bangkay ni Jesus upang mangyari ang sinabi Niya na Siya ay mabubuhay sa ikatlong araw.

Nagpakita si Jesus sa Kanyang mga Alagad: Habang nag-uusap ang mga alagad, tumayo si Jesus sa kalagitnaan nila at sinabing sumakanila ang kapayapaan. Natigilan ang mga alagad at natakot sapagkat akala nila'y nakakita sila ng multo. Parang hindi pa rin sila makapaniwala sa laki ng galak at pagkamangha. Humingi sa kanila si Jesus ng pagkain at kumain Siya sa kanilang harapan.

Sinabi ni Jesus sa kanila na iyon ang tinutukoy Niya nang sabihin Niya sa kanila na Siya ay lagi nilang kasa-kasama. Binuksan Niya ang kanilang pag-iisip upang maunawaan nila ang mga Kasulatan. Sinabi Niya sa kanila, Ganito ang nasusulat: *kinakailangang magdusa at mamatay ang Cristo; at pagkatapos, Siya'y muling mabubuhay sa ikatlong araw. Sa Kanyang pangalan, ang pagsisisi at kapatawaran ng mga kasalanan ay dapat ipangaral sa lahat ng mga bansa, magmula sa Jerusalem. Kayo ang mga saksi sa mga bagay na ito. Tandaan ninyo, isusugo Ko sa inyo ang ipinangako ng aking Ama, kaya't huwag kayong aalis sa Jerusalem hangga't hindi kayo napagkakalooban ng kapangyarihang mula sa langit."*

Ang Pag-Akyat ni Jesus sa Langit. Pagkatapos ng mga ito, sila'y isinama ni Jesus sa labas ng lunsod. Pagdating sa Bethania, itinaas Niya ang Kanyang mga kamay at sila'y binasbasan. Habang binabasbasan Niya sila, Siya'y umalis at dinala paakyat sa langit. Siya'y sinamba nila at pagkatapos ay bumalik sila sa Jerusalem na punung-puno ng kagalakan. Palagi silang nasa Templo at doo'y nagpupuri sa Diyos.

Ang Ascension (30 AD)

Sa mga huling sandali ng Panginoong Jesus sa lupa, bago Siya umakyat sa langit, nakipagkita Siya sa labing isang alagad sa Galilea, sa bundok na Kanyang sinabi sa kanila. Lumapit si Jesus sa kanila. Sinabi ni Jesus na ibinigay na sa Kanya ang lahat ng kapangyarihan sa langit at sa lupa. Kaya't inutusan Niya ang mga

alagad na humayo at gawing alagad ang mga tao sa lahat ng bansa. Inutos din Niyang bautismuhan sila sa pangalan ng Ama, ng Anak at ng Espiritung Banal. Dapat nilang turuan at sumunod ang mga ito sa lahat ng Kanyang iniutos at Siya ay lagi nilang kasama hanggang sa katapusan ng panahon.

Sinabi Niya rin sa Kanyang mga alagad na huwag munang aalis at hihintayin nila ang ipinangako ng Ama na sila ay babautismuhan ng Banal na Espiritu. Nang sa ganoon, sila ang Kanyang magiging saksi sa Jerusalem, sa buong Judea at Samaria at sa kasulok-sulukan ng mundo.

Matapos magsalita ng Panginoong Jesus, nakita ng mga alagad na umaangat Siya at kinuha Siya ng ulap mula sa kanilang mga paningin. Habang nakatitig sila sa langit, may dalawang lalaki na nagsabi sa kanila na si Jesus na kinuha sa kanila patungong langit ay babalik din sa ganoong paraan kung paano nila Siyang nakita na umakyat sa langit.

The Road to Emmaus (Luke 24:13-35)

Sa araw ding iyon, sina Cleopas at Simon ay naglakbay patungo sa isang bayan ng Emmaus, pitong milya mula sa Jerusalem. Pinag-uusapan nila ang mga kaganapan. Habang sila ay nag-uusap, lumapit si Jesus subalit hindi nila Siya nakilala. Tinanong sila ni Jesus kung ano ba ang kanilang pinag-uusapan. Sinabi ni Cleopas sa Kanya na Siya lang ang dayuhan na hindi nakakaalam ng mga pangyayaring kaganapan lamang sa Jerusalem. Tinanong sila ni Jesus kung anong mga pangyayari iyon.

Tumugon sila, Ang tungkol kay Jesus na taga Nazareth. Siya ay isang propeta na makapangyarihan sa salita at gawa sa harap ng Diyos at ng mga tao. Subalit Siya ay isinakdal ng aming punong pari at mga pinuno ng bayan upang mahatulan ng kamatayan kaya Siya ay ipinako sa krus. Siya pa naman ang inaasahan naming magpapalaya sa aming bayan. Nabigla kami sa ibinalita ng mga kababaihang kasama namin na hindi nila natagpuan ang Kanyang bangkay nang sila ay pumaroon sa libingan kaninang madaling araw. Nagbalik sila at ang sabi ay nakakita raw sila ng pangitain, mga anghel na nagsabing si Jesus ay buhay.

Sinagot sila ni Jesus, *Napakahangal ninyo at ang kupad maniwala sa mga ipinahayag na ng mga propeta. Di ba't kailangang magdusa ng Cristo bago Siya pumasok sa Kanyang kaluwalhatian? Ipinaliwanag ni Jesus ang lahat ng sinasabi ng Kasulatan tungkol sa Kanya, simula pa lang sa aklat ni Moses hanggang sa mga sinulat ng mga propeta.*

Nang malapit na sila sa bayan, niyaya nilang sumama si Jesus sa kanila. Sa hapag kainan, kinuha ni Jesus ang tinapay, pinaggala ito at ipinamahagi sa kanila. Noon lamang nabuksan ang kanilang mga mata at nakilala si Jesus subalit Siya ay biglang naglaho. Nasabi nila sa isa't isa na kaya pala parang nag-aalab ang kanilang puso habang sila ay kinakausap Niya sa daan at ipinaliwanag ang mga Kasulatan.

Tumayo sila at nagbalik sa Jerusalem. Dinatnan nilang nagkakatipon ang ibang kasamahan nila. Ibinalita nilang totoong muling nabuhay ang Panginoon.

Jesus Showed Himself to 500

Ipinaalala ni Paul sa mga taga Corinto ang patungkol sa ebanghelyo na kanyang ibinahagi sa kanila na kanilang tinayuan. (1 Corinthians 15:1-7)

Sinabi rin niya na ang kanyang ipinamahagi sa kanila ay pinakamahalaga: na si Cristo ay namatay para sa ating mga kasalanan ayon sa mga Kasulatan, na Siya ay inilibing at muling nabuhay sa ikatlong araw ayon

sa mga Kasulatan. At si Cristo ay nagpakita kay Cephas at pagkatapos sa labindalawa. Matapos nito ay nagpakita rin Siya sa 500 kapatiran sa isang pagkakataon. Pagkatapos ay nagpakita din si Jesus kay James at sa lahat ng apostles. At pinakahuli, nagpakita si Jesus sa kanya.



=====

Sources:

¹The Reformation Study Bible English Standard Version

²<https://www.biblestudytools.com/topical-verses/parables-of-jesus/>

³<https://www.christianity.com/jesus/life-of-jesus/miracles>

⁴<https://www.understandchristianity.com/timelines/chronology-jesus-life-minist>

⁵<https://amazingbibletimeline.com/>

Multiple Choice (704 Death):

1. Ayon sa Matthew 26:27-28, dumanak ang dugo ni Cristo para sa kapatawaran ng kasalanan ng:
 - a. kaunting tao.
 - b. maraming tao.
 - c. lahat ng tao.

2. Ayon sa John 16:13-14, ang Holy Spirit ay isusugo ni Cristo upang:
 - a. ituro sa mga alagad ni Cristo ang mga katotohanan na tinuro ni Cristo.
 - b. magpahayag ng mga karagdagang katuruan para sa Iglesia ng Lord.
 - c. bigyan ng kapangyarihan na makagawa ng milagro ang mga alagad ng Lord.
 - d. All of the above

3. Ayon sa Luke 23:29-43, isa sa dalawang magnanakaw na nakapako sa krus sa magkabilang tabi ng Panginoon ay mauwi sa Paraiso dahil:
 - a. mas marami naman siyang nagawang kabutihan kaysa kasamaan.
 - b. napilitan siyang magnakaw dahil nagugutom na ang kanyang pamilya.
 - c. nilagay niya ang kanyang kapalaran sa kamay ng Panginoon Jesus.
 - d. All of the above

4. Ano ang tamang statement?
 - a. Hindi naman tunay na namatay si Cristo dahil Siya ay Diyos Anak .
 - b. Si Jesus ay namatay at hindi naman talagang nabuhay muli dahil Siya ay tao lamang.
 - c. Si Jesus ay namatay at sa ikatlong araw ay nabuhay muli.

5. Ano ang bilin ni Cristo sa Kanyang mga disipulo bago Siya tuluyang umakyat ng langit?
 - a. Ibahagi ang ebanghelyo sa lahat ng dako.
 - b. Maging ilaw at asin sa kani-kanilang comunidad at pagkatapos ay sa mga karatig pook.
 - c. Magpalaki ng mga disipulo sa lahat ng nasyon.
 - d. All of the above

6. Ano ang makakamtan ng mga taong naniniwala at nagtitiwala sa salita ni Cristo?
 - a. Sila ay magiging saksi sa katapatan at kapangyarihan ni Cristo.
 - b. Sila ay makakapag-milagro.
 - c. Magkakaroon sila ng mega-church.
 - d. All of the above

7. Ano ang mabuti at tamang sunding prinsipyo o gabay sa buhay?
 - a. Ang magtiwala sa palagay ng expert.
 - b. Sumabay sa agos ng mundo.
 - c. Ang sumunod sa pinag-uutos ng Diyos na nakasulat sa Bibliya.
 - d. All of the above